

Recycling fir d'Gesellschaft

Tania Naskandy: *Am Bësch*

Myriam
Welschbillig

*Ech stinn iwwerhaupt net am Liewen. Ech leien dran.
An zwar ganz ënnen.*

An den dräi Romaner vum Tania Naskandy alias Guy Rewenig stinn déi am Mëttelpunkt, mat deenen d'Liewen et net esou gut gemengt huet. A *Sibiresch Eisebunn* schaaft sech d'Leny Kramp, eng Mamm, déi mat hirem Bouf eleng do steet, hir eege Welt, well se dat wierklecht Liewen net méi packt. De *Feierläscher* Manou Mangen verkeeft Trousch a geet bei senger Aarbecht bal selwer zu Gronn, well e grad esou eleng ass wéi seng Clienten. Am drëtte Band vum Tania Naskandy wullen de Branko Rescovic an de Sven Lammar wuertwiertlech am Dreck vun der Gesellschaft, am Recycling-Center. Ma am Bësch, no der Schicht, kënnen si erëm opliewen.


De Sven, genannt Cowboy, an de Branko si grad aus dem Prisong entlooss ginn a sollen erëm an d'Gesellschaft integréiert ginn. Si kréien eng Aarbecht am Recycling-Center an hir Betreier, dorënner och de Sébastien, gi sech immens vill Méi ze beweisen, datt d'Resozialiséierung vun deenen zwee klappt. Mä et schéngt, wéi wa weder de Branko nach de Cowboy Loscht op eng Integratioun an dës Gesellschaft hätten, well si boykottéieren all Versuch, sech an dat gesellschaftlecht „Riederwierk“ eraquetschen ze loossen. Verbal Gewalt géint d'Clienten am *Rizeikli*, Vandalismus un deieren Autoen, Klauen an Tätleckeete géint déi, déi sech hinnen an de Wee stellen – dat gëtt net d'Bild vu Matbierger, mat deenen een et gär ze dinn huet. Et ass meeschtens de Branko, dee bei all deem den Toun ugëtt. Zynesch, sarkastesch, aggressiv, ouni Respekt viru kengem, mat zwou Fäischten als Äntwert op all klengste Provokatioun. De Cowboy léisst sech matzéien, rebelléiert manner, profitéiert awer vum Branko sengem Verhalen.

De Sébastien, de Kontroller vun hirer *Liberté surveillée*, ka sech zwar mëndlech duerchsetzen, mä huet um Enn och keen Afloss op dem Branko an dem Sven säi Verhalen. De Branko bleift no der Entloossung deen haarde Käre, deen ëmmer op Konfrontatioun aus ass a kee verschount ausser dem Cowboy. Deen dogéint schéngt mat Momenter e gewëssent Potential ze hunn, awer nach iergendwéi an der Gesellschaft fonctionnéieren ze kënnen. Op d'mannst huet hie seng kriminell Energie besser ënner Kontroll an e versicht ëmmer erëm, de Branko ze zëssen.

Hir *Liberté surveillée* verwandelt sech awer an eng *Liberté absolue*, wa si sech op hir al Hondae sëtze kënnen an domat duerch de Bësch briederen. Och hei huele si keng Rücksicht op Mënsch oder Déier. *Sief e Stéier am Verkéier*, mengt de Branko: Wie sech hinnen an de Wee stellt, gëtt radikal ewechgedickt. Eréischt op der Honda fille si sech fräi, gi si zu Mënschen, eraus aus dem Dreck an dem Zwang, deen eng Gesellschaft nun emol jiddwerengem operleet. Datt d'Recht vun deenen aneren op genee déiselwecht Fräiheet dobäi mat Féiss getrëppelt gëtt, dat ass fir si keen Argument. An genee dat féiert enges Daags riicht an d'Katastroph.

Un d'Vergaangenheet wëll kee vun deenen zwee erënnert ginn. Dogéint wiert sech esouguer de Cowboy vehement: *Wann d'Gespenster opdauchen, muss een e bësse rabiater sinn. Et muss ee s'ërféieren. Ech ka keng Gespenster brauchen. Sven Lammar! Wéini war*

Tania Naskandy: *Am Bësch*,
ultimomondo, Sandweiler
2010, 155 Säiten, 20 €



D'Myriam Welschbillig schafft virun allem als fräiberuffleche
Iwwersetzerin, mat Schwéierpunkt op Iwwersetzungen an
d'Lëtzebuergesch. Donieft gëtt hat Coursen an der Lëtzebuerg
Schreifweis, huet um däitsche Luxdico matgeschafft a schafft mat
um Spellchecker.lu (traduction@mwt.lu).

dat dann? Och déi beschten Therapie kann d'Billen aus der Kannerzäit net läschen an opgerappte Wonnen net heelen: Hei gëtt näischt méi opgerullt. Mäi Kapp ass en däischtert Lach.


Et gëtt näischt schéi geschwat *Am Bësch*. D'Erzielinstanz, déi aus der Perspektiv vum Sven Lammar schwätzt, entschëllegt näischt, beklot sech net, reflektéiert net. Et gëtt erzielt, ouni Emotiounen, an einfachen, kuerze Sätz. D'Thème reduzéiere sech op dat, wat jonk Männer, Gesetzesbriecher, op hirer *Descente infernale* erliewen: aggressiven Ëmgank mat deenen anere Leit, Kontakter mat den Autoritéiten, physisch Gewalt a Fraleitsgeschichten, déi sech zum groussen Deel op Sex reduzéieren. An dotëscht gëtt, kuerz an awer däitlech, mam Fanger op en net maner respektlos an onéierlecht Verhale vun „éierbare“ Bierger gewisen: E Beklaute gëtt bei der Police un, datt e vill méi geholl kritt huet; de Riichter kann de Branko net bei der Police mellen, well e selwer eng gestëbt huet; e Matbierger geheet seng Fra wéi eng benotzte Spillsaach einfach ewech – de Branko bréngt se fir de Cowboy mat an de Recycling: *Ech bréngen der eng Braut. ... Aus Thailand. Huet engem Lëtzebuerger gehéiert. ... Deen hat d'Maischen einfach kaaft.*

Ironie kléngt mat an de Sequenzen, an deenen de Branko an de Cowboy a verschiddenen Tätegkeeten *den challenge vun onentdeckte Méiglechkeete kreativ ... attackéieren*. Ob s'elo bei *Rent a sorrow Partner* d'Famill vum Verstuerwenen ersetzen, Politiker bei enger Publicitéitsaktioun ënnerstëtzen oder Loftballone fir Kanner mussen opblösen: Keen ass sech ze schued, Krimineller z'engagéieren, wann d'Mënz stëmmt.

A wann de Branko op enger Plaz mengt: Déi ganz Lëtzebuerger Sprooch ass eng eenzeg Beamtebeleidigung, da muss een och soen, datt dem Branko seng Sprooch eng eenzeg Beleidigung fir de Lieser ass. Aggressiv, voller Kraaftausdréck, brutal an einfach krass. Eng ganz aner Sprooch wéi déi vun de Sozialaarbechter, mat hiren distinguéierte franséische Fachausdréck, mat deene si eng Distanz tëscht sech an hire Clienten opbauen. D'Sprooch als Barriär tëscht deem, deen Hëllef soll, an deem, dee soll gehollef kréien?

Wéi a *Sibiresch Eisebunn* a *Feierlächter* beweegt sech alles bannent enger gewësser Zäit op en Héichpunkt zou. *Et ass alles eng Eskalatioun, Sven. Déi Spiral vu Gewalt ... De Krich geet schonn um Schoulhaff un*, mengt d'Léierin, déi hire Schüler ni opginn huet an eng zentral Roll am Roman spillt. D'Zeeenen aus der Kandheet déngen als Erklärung fir d'Verhale vum Branko a vum Sven. Als erwuesse Leit hu si awer

trotz Resozialiséierungsversich am Prisong keng Entwécklung matgemaach. Sou wonnert et een net, datt alles eskaliert a Gewalt um Enn just nach méi Gewalt provoziert. D'Erzielung geheet vill Froen op. Eng vu villen, déi ee sech sécher stelle kann, ass déi, ob mer et hei net, wéi och an deenen zwee aneren Naskandy-Wierker, mam Bankrott vum System um gesellschaftlechen Niveau ze dinn hunn? E System, dat e Branko an e Cowboy ervirbréngt respektiv e System, dat engem Branko net méi Hëllef kann, en net stoppe kann? Wat sinn adäquat Mëttelen, fir esou Zäitbommen z'entschärfen? Et kann een *Am Bësch* sécher als eng Kritik un enger Gesellschaft liesen, déi laang d'Aen an d'Oueren zoumécht, an herno iwwerfuerdert ass mat der Brutalitéit a Gesetzlosegkeet, déi se selwer op déi eng oder aner Manéier opkomme gelooss huet. Et mécht Angscht ze wëssen, dass esou Zäitbommen wéi Branko an och Cowboy an der Gesellschaft erëmlafen a vläicht sollte mer all eise Kartrong déi nächste Kéier, wa mer op de „Rizeikli“ fueren, am Virus schéi brav falen. ♦



MISSION CULTURE SCIENTIFIQUE ET TECHNIQUE | mcst@uni.lu

LES JEUDIS DES SCIENCES COLLOQUIUM GÉNÉRALE
LEÇON 154 SEMESTRE XX

La mort de Tycho Brahe ou la chute du géocentrisme

Peter Andersen Université de Strasbourg

09.06.2011 17:30

Auditoire B02 Campus Kirchberg

En y construisant un château féerique, Tycho Brahe attira les regards du monde entier sur sa petite île danoise. Après de longues années d'observations assidues, le géocentriste fut chassé de sa patrie et mourut à Prague. Sa mort suspecte coïncida avec l'entrée du Danemark dans l'ère de l'astronomie moderne. Le 13 juillet 1602, Copernic fut glorifié à Copenhague par l'ennemi de l'astronome défunt.

Peter Andersen a fait des études de langue et littérature allemande et française à Grenoble et à Amiens où il a soutenu sa thèse de doctorat en 2000. Il a été chargé de cours à l'Université de Copenhague et maître de conférences à l'Université de Tours et depuis 2006 il est professeur de littérature et d'histoire ancienne au Département d'études allemandes de l'Université de Strasbourg. Il travaille sur l'ensemble des pays germaniques et s'intéresse depuis plusieurs années à la Renaissance scandinave. Il a publié deux ouvrages sur les mythes engendrés par la célébrité de Tycho Brahe.

EN COLLABORATION AVEC LES AMATEURS ASTRONOMES DU LUXEMBOURG

AVEC LE SOUTIEN DU FONDS NATIONAL DE LA RECHERCHE

Attestation de participation sur demande | Teilnahmebestätigung auf Anfrage | Confirmation of participation upon request